

## DOMENIE XXII «VIE PAL AN»

### Antifone di jentrade cf. Sal 85,3.5

**V**e dûl di me, Signôr,  
che o ài berlât viers di te dute la zornade:  
tu tu sêts bon, Signôr, e tu perdonis,  
tu sêts cjamât di boncûr cun ducj chei che ti clamin.

### Colete

Diu di ogni perfezion, che al è to dut ce che di miôr al è tal mont,  
semene tai nestris cûrs l'amôr pal to non,  
nudrîs in nô, cul cressi de fede, dutis lis robis buinis  
e, cul nestri impegn, vuarde ce che tu âs nudrît.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Jer 20,7-9

**L**a peraule dal Signôr e je deventade par me une vergogne.

Dal libri dal profete Jeremie

Tu mi âs imbroiât, Signôr, e jo mi soi lassât imbroiâ;  
tu mi âs sfuarçât e tu le âs vinçude.  
O soi deventât une sblefe seguitive,  
a son ducj che mi ridin daûr.

Parcè che ogni volte che o feveli o ài di berlâ,  
o ài di professâ: «Violence e ruvine!».

Propit! La peraule dal Signôr e je deventade par me  
une vergogne e une sblefe seguitive.

Par chel o pensavi: «No vuei plui impensâmi di lui  
e no fevelarai plui tal so non!».

Ma tal gno cûr al jere  
tant che un fûc che al bruse  
strucât intai miei vues;  
o cirivi di domâlu  
ma no ài rivât.  
Peraule di Diu.

### SALM RESPONSORIAL dal Salm 62

**R.** E à sêt di te, Signôr, la mê anime.

Diu, Diu gno, sul crichedì o soi pront a cirîti;  
e à arsetât di te la mê anime;  
viers di te la mê cjar e brame  
come une tieres sute, arsinide, cence aghe. **R.**

Cussì mi soi metût a cjalâti tal to santuari  
par viodi la tô potence e la tô glorie.  
Parcè che la tô gracie e val plui che no la vite,  
a cjanteran i miei lavris lis tôs laudis. **R.**

Cussì ti benedissarai par dute la vite,  
lis mans viers dal to non o slungjarai.  
La mê vite si passarà come te miôr taulade,  
biel che la mê bocje ti laudarà cjantant di ligrie. **R.**

Tu sêts stât tu il gno jutori,  
jo mi jempli di gjonde sot des tôs alis.  
Tor di te si strenç la mê anime,  
la fuarce de tô diestre mi sostente. **R.**

### SECONDE LETURE Rm 12,1-2

Ufrît i vuestris cuarps come une vitime vive.

De letare di san Pauli apuestul ai Romans  
Fradis, us racomandi pal boneçûr di Diu di ufrî i vuestris cuarps come une vitime vive, sante, che i plâs a Diu, e chest al è il vuestri cult spirituâl. No stait a cjapâ sù il mût di compuartâsi di chest mont ma trasformaitsi di un continui, rinnovant simpri la vuestre cussience, in mût di rivâ a capî ben ce che Diu al vûl concretamentri di vualtris, ce che al è bon, ce che i plâs di plui, ce che al è perfet. Peraule di Diu.

### CJANT AL VANZELI cf. Ef 1,17-18

**R.** Aleluia, aleluia.

Il Pari dal nestri Signôr Jesù Crist  
che nus dedi un spirt di sapience,  
par che o podin capî  
cuale che e je la sperance de nestre clamade.

**R.** Aleluia.

### VANZELI Mt 16,21-27

Se un al vûl vignî daûr di me, che al rinei se stes.

Dal vanzeli seont Matieu

In chê volte, Jesù al scomençà a fâur viodi ai siei dissepui che lui al scugnive lâ a Jerusalem e patî un grum par colpe dai anzians, dai sorestants dai predis e dai scrituriscj; che al scugnive anche jessi copât, ma che la tierce dì al sarès resurît. Alore Pieri lu tirà in bande e al cirive di sconseâlu disint: «Diu ti vuardi, Signôr! Chest no ti sucedarà mai plui e mai altri». Ma lui, voltantsi cuintri di Pieri, i disè: «Va lontan di me, satane! Tu mi sêts di scandul, parcè che lis tôs ideis no son chêts di Diu ma chêts dai oms!».

Alore Jesù ur disè ai siei dissepui: «Se un al vûl vignî daûr di me, che al rinei se stes, che al cjapi sù la sô crôs e che al vegni daûr di me. Parcè che chel che al vûl salvâ la sô vite le pierdarà; invezit chel che al pierdarà la sô vite par colpe mê le cjatarà. Di fat ce i zovaraial mo al om se, dopo di vê cjapât magari il mont intîr, al ruvine la sô vite? O ben, ce podaraial dâ l'om sore de sô vite? Di fat il Fi dal om al vignarà te glorie di so Pari compagnât dai siei agnui e in chê volte i darà a ognidun seont la sô condote».

Peraule dal Signôr.

### Su lis ufiertis

Cheste sante ufierte nus siguri simpri, Signôr,  
la tô benedizion e la tô salvece  
e cu la sô fuarce e colmi ce che e opere intal misteri.

Par Crist nestri Signôr.

**Antifone a la comunion Sal 30,20**

Cetant grant che al è, Signôr, il to boncûr!  
Tu lu teginis di bande par chei che ti temin.

**O ben: Mt 5,9-10**

Furtunâts chei che a lavorin pe pâs, parcè che ur disaran fîs di Diu.  
Furtunâts chei che a son perseguitâts par colpe de justizie,  
parcè che il ream dai cîi al è lôr.

**Daspò de comunion**

Nudrîts cul pan dal cîl, ti preìn, Signôr,  
che chest sostentament dal to bonvolê al rinfuartissi i nestris cûrs  
e nus sburti a servîti intai nestris fradis.  
Par Crist nestri Signôr.